
Dialog kukuh Malaysia hab teknologi hijau

FORUM Malaysia-Eropah (MEF) akan menggunakan Dialog Musim Bunga MEF-Vienna yang akan berlangsung di Vienna, Austria pada 9 Mei ini bagi memperkukuhkan kedudukan Malaysia sebagai hab teknologi dan perniagaan hijau di ASEAN.

Penasihat dan penaung pertubuhan bukan kerajaan itu, Tan Sri Rafidah Aziz, berkata dialog sehari diadakan setiap tahun ketika musim bunga di Eropah itu akan memberi tumpuan kepada hal berkaitan teknologi hijau dan perniagaan hijau.

Katanya, dialog bertemakan Malaysia: Hab Ekonomi Hijau Anda di ASEAN itu akan bermula dengan ucapan Menteri Tenaga, Teknologi Hijau dan Air, Datuk Seri Peter Chin Fah Kui.

"Dialog di Vienna ini sebahagian usaha berterusan MEF mewujudkan pemahaman lebih baik ke atas Malaysia serta meningkatkan minat perniagaan hijau di Malaysia dan Eropah," katanya di Kuala Lumpur, semalam.